

---

# Helpem Ol Pikinini blong Yu blong Gat Saksess long Skul

Gaedbuk blong Papa mo Mama

---



---

“Wanem level blong waes yumi kasem long laef ia, bae hem i stap wetem yumi long taem blong laef bakegen long ded.

“Mo sapos wan i kasem moa save mo waes long laef ia tru long fasin blong hem blong wok strong wetem strong tingting mo fasin blong stap obei bitim wan narawan, bae hem i blong gud blong hem we bae i bitim narawan long wol we bae i kam.”

**Doktrin mo Ol Kavenan 130:18-19**

Jos Ia blong Jisas Kraes blong Ol Lata-dei Sent  
Sol Lek Siti, Yuta, i pablisim

© 2021 i kam long Intellectual Reserve, Inc.

All rights reserved.

Vesen: 2/21

Translesen blong *Help Your Children Succeed in School: Parent Guide*

Bislama

PD60012305 852

Oli printim long Yunaeted Stet blong Amerika

# Oi Samting we Oli Stap Insaed

**Welkam** \_\_\_\_\_ **2**

## **Oi Topik**

1: Edukesen Hem I Impoten \_\_\_\_\_ **3**

2: Helpem Oi Pikinini blong Yu blong Lanem samting \_\_\_\_\_ **7**

3: Yumi Oi Pikinini blong God \_\_\_\_\_ **11**

4: Mekem Oi Gol blong Helpem Oi Pikinini blong Yu blong Gat Sakses \_\_\_\_\_ **15**

5: Lanem Samting Tugeta long Hom \_\_\_\_\_ **19**

6: Yusum Taem Wetem Waes \_\_\_\_\_ **23**

7: Helpem Oi Pikinini blong Praktis blong Rid, Raet, mo Mekem Matematik \_\_\_\_\_ **27**

8: Helpem Oi Pikinini Wetem Skulwok long Hom \_\_\_\_\_ **31**

9: Kam Pat long Edukesen blong Oi Pikinini blong Yu \_\_\_\_\_ **35**

Oi Wei blong Helpem Oi Pikinini blong Yu blong Gat Sakses long Skul mo Filim se  
Oli Lavem Olgeta \_\_\_\_\_ **39**



## Welkam

Gaedbuk ia bae i helpem yu blong lanem olsem wanem blong yu helpem ol pikinini blong yu blong lanem samting long skul mo long haos.

Ol pikinini oli stap lan aot long ol papa mo mama, mo ol tija. Oli stap lanem samting tu tru long wok, pleiplei mo ol kwestin we oli askem. Ol famli oli impoten tumas, mo oli save helpem ol pikinini blong stap lanem samting. Taem ol famli oli sapotem ol pikinini blong stap lanem samting, bae ol pikinini oli filim hapi mo harem gud abaot olgetawan. Ol pikinini oli wantem tu, blong lanem moa samting.

Toktok wetem famli blong yu abaot ol samting we yu lanem taem yu stap ridim gaedbuk ia. Prea blong gat help long Papa long Heven. I nomata sapos yu no gat plante edukesen, yu save helpem pikinini blong yu yet blong stap lanem samting. Lod bae i helpem yu mo ol pikinini blong yu blong lanem samting tugeta taem yufala i mekem wok, pleiplei, toktok wetem wanwan long yufala mo rid.

### **Olsem Wanem blong Yusum Gaedbuk Ia**

Ol papa mo mama oli save stadi long gaed buk ia tugeta, wetem ol pikinini blong olgeta, o wetem ol narafala papa mo mama. Ol lida blong Jos oli save invaetem ol papa mo mama blong mit tugeta, mo toktok raon long ol topik insaed long gaedbuk ia. Ol givhan brata mo sista oli save toktok tu, abaot ol topik insaed long gaedbuk ia wetem ol famli we oli stap givhan long olgeta.

### **Olsem Wanem blong Stadi long Wanwan Topik**

Folem ol step ia taem yu stap stadi long wanwan topik insaed long gaed buk ia:

1. Invaetem ol narafalawan blong stadi long topik wetem yu, o stadi long topik yuwan.
2. Tingting long ol kwestin mo tokbaot olgeta.
3. Ridim mo mekem ol aktiviti.
4. Tingting mo prea abaot wanem we yu bin lanem.
5. Tokbaot wanem yu bin lanem wetem famli blong yu.



# 1

## Edukesen Hem I Impoten

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem nao ol famli oli stap lan tugeta?
3. ?From wanem eduken i impoten?



### Lanem Samting

Edukesen hem i pat blong plan blong God. Insaed long skripja i talem: "Lukaotem ol toktok blong waes tingting insaed long ol buk we oli moa gud; lukaotem blong lanem samting, tru long stadi, mo tu, tru long fet" (Doktrin mo Ol Kavenan 88:118). Taem yumi stap lanem samting mo gro, bae yumi lanem moa abaot plan blong God long yumi.

Jisas Kraes i wan eksampol blong wan man we i save gud blong lanem samting. Ol skripja oli tijim yumi se Jisas "i groap moa long waes blong hem" (Luk 2:52). Papa long Heven bae i blesem yu mo helpem yu blong lanem samting. Bae Hem i blesem ol pikinini blong yu taem oli lanem mo folem eksampol blong Jisas.



Presiden Gordon B Hinckley i tijim se "edukesen hem i ki ia we bae i openem doa blong janis"(Let Virtue Garnish Thy Thoughts Unceasingly," *Liahona*, May 2007, 116). Hemia i minim se edukesen i save helpem yu mo ol pikinini blong yu blong lanem ol niu skil. Hem i save helpem yu blong tijim ol narawan mo lukaotem famli blong yu.

### Tingting mo Prea

Tingting mo prea abaot wanem ol samting we yu bin lanem. Raetemdaon eni tingting we yu gat, o, ol aedia we i kam tru long Tabu Spirit. ?Wanem nao yu ting se Lod i wantem yu blong mekem?

---



---



---

**Aktiviti**

Luk ol pikja andanit ia. Tingting mo toktok raon long wanem nao yu luk, we ol man oli stap mekem long wanwan pikja ia. ?Olsem wanem nao yu ting se fasin blong stap lanem samting mo edukesen i helpem ol man long ol pikja ia?



**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin andanit ia. Askem ol memba long famli blong blong yu, blong oli serem ol tingting blong olgeta mo lisin long wanwan long olgeta.

- ?Blong stap folem eksampol blong Jisas, i helpem yu olsem wanem long skul?
- ?Olsem wanem nao edukesen i save helpem yu long laef blong yu?
- ?Wanem nao yumi save mekem olsem wan famli blong helhelpem wanwan long yufala blong lanem samting mo groap?





# 2

## Helpem Ol Pikinini blong Yu blong Lanem Samting

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem nao ol mama oli stap tijim ol pikinini blong olgeta long ol pikja ia?
3. ?Wanem i wan samting, we yu stap mekem blong tijim ol pikinini blong yu?



### Lanem Samting

Papa mo mama i kea long ol pikinini blong olgeta long plante wei. Yu blesem ol pikinini blong yu evri dei, taem yu stap helpem olgeta blong lanem samting. Taem ol pikinini oli lanem samting, oli filim gud abaot olgetawan mo wantem blong lanem moa

Ol narafala man oli save helpem ol pikinini blong yu blong lanem samting, be papa mo mama, tufala i ol fas mo nambawan tija blong ol pikinini. Yu save helpem ol pikinini blong yu blong oli save se oli stap kam moa olsem Papa blong yumi long Heven mo Pikinini blong Hem Jisas Kraes, taem oli stap lan.

Ol pikinini blong yu oli stap luk wanem yu stap mekem. Taem oli luk se yu tekem taem blong lanem samting, bae oli save se edukesen i impoten. I gat plante wei we yu save gohed blong lanem:

- Stadi ol skripja.
- Ridim ol buk.
- Toktok wetem ol pipol abaot ol nius raon long yu mo long wol.
- Kasem moa trening blong mekem wok blong yu i kam moa gud.
- Kasem moa edukesen long skul.
- Lanem ol niufala skil.



### Tingting mo Prea.

Tingting long wanem yu bin lanem.

Raetemdaon eni tingting we yu gat o ol aedia

we i kam tru long Tabu Spirit. ?Wanem nao

yu ting se Lod i wantem yu blong mekem?

?Olsem wanem yu save stap olsem wan

eksampol long ol pikinini blong yu blong stap gogohed blong lanem samting?

---



---



---

# 2

## Helpem Ol Pikinini blong Yu blong Lanem Samting

### Aktiviti

?Olsem wanem nao yu save helpem wanwan memba blong famli blog oli lanem samting?  
Askem ol memba blong famli blong yu abaot wanem oli wantem blong lanem samting, mo olsem wanem yu save helpem olgeta. Raetem ol ansa blong olgeta andanit ia.

<b>Ol Memba blong Famli</b>	<b>?Wanem Nao Oli Wantem blong Lanem?</b>	<b>?Olsem Wanem Nao Yu Save Helpem Olgeta?</b>
<b><i>Eksampol</i></b> Derek (boe)	<i>-Pasem eksam blong mekem se hem i save go long sekendri skul -Lanem Inglis gud moa</i>	<i>-Lanem ol deit blong eksam -Luklukbak long skulwok long hom -Toktok Inglis long hom blong mifala</i>

**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin andanit ia. Askem ol memba blong famli blong yu blong oli serem ol tingting blong olgeta mo lisin long wanwan long yufala.

- ?Olsem wanem nao, blong stap lanem samting, i helpem yumi blong kam moa olsem Papa blong yumi long Heven?
- ?Olsem wanem nao yumi save helpem evri memba blong famli blong oli lanem samting mo gohed long edukesen blong olgeta?



# 3

## Yumi Ol Pikinini blong God

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Wanem nao yu save mekem blong helpem ol pikinini blong yu, blong oli save se oli ol pikinini blong God?
3. Taem oli save se oli ol pikinini blong God, ?olsem wanem nao hemia i helpem olgeta blong gat saksas long skul?



**Lanem Samting**

Tijim ol pikinini blong yu, se yumi ol pikinini blong God. Yumi evriwan i save kam olsem Hem taem yumi stap lanem samting mo groap. Helpem ol pikinini blong yu blong oli andastanem se, oli save gat sakses long skul from se oli ol pikinini blong God. Ol aedia andanit ia bae i helpem ol pikinini blong yu blong oli gat sakses long skul:

**Lukluk Nomo long Skul**

Helpem ol pikinini blong yu blong oli go long skul mo stap long skul long taem. Oli mas traem blong go long skul evri dei mo rere from ol impoten eksam.

**Traem Bes blong Yu**

Tijim ol pikinini blong yu blong traem bes blong olgeta mo no givap taem ol samting oli kam had.

**Stap Obei**

Tijim ol pikinini blong yu blong obei long ol komanmen, papa mo mama blong olgeta mo ol rul blong skul. Bae oli kasem blesing from se oli stap obei.

**Askem Help**

Tijim ol pikinini blong yu blong askem help mo stap lanem samting aot long ol narafala man. Prea wetem olgeta taem oli no andastanem olsem wanem blong mekem wan samting.

**Toktok Tugeta**

Toktok wetem ol pikinini blong yu mo letem olgeta oli save se, oli save kam luk yu taem oli nidim help. Askem olgeta abaot ol samting we i had long olgeta. Wok tugeta blong strettem ol problem.

**Biliv long Yuwan**

Helpem ol pikinini blong yu, blong oli biliv long olgetawan mo tingting long ol gudfala samting. Taem ol pikinini oli tingting long ol gudfala samting abaot olgetawan, oli filim se oli save gat sakses.

**Tingting mo Prea**

Tingting long wanem we yu bin lanem. Raetemdaon eni tingting we yu gat o ol aedia we i kam tru long Tabu Spirit. ?Wanem nao yu ting se Lod i wantem yu blong mekem? ?Wanem nao yu save mekem blong helpem ol pikinini blong yu blong oli save gat sakses long skul?

---



---



---

# 3

## Yumi Ol Pikinini blong God

---

### Aktiviti

Yumi ol pikinini blong God mo Hem i lavem yumi. Hem i lavem yu mo famli blong yu. Tingting long ol wei we God i stap lukluk evri memba blong famli blong yu. Long emti spes andanit ia, raetem sam toktok o droem sam pikja blong soem wan o tu gudfala samting abaot wanwan insaed long famli blong yu. Serem olgeta samting ia wetem famli blong yu.

#### Eksampol

Kofi: 

*Priscilla i kaen.*

*Fehi i hapi.*

*Sione i wan man blong wokhad.*

---

Droem ol pikja blong yu mo raetem ol toktok blong yu long emti spes andanit:

---

**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin andanit ia. Askem ol memba blong famli blong yu, blong oli serem ol tingting blong olgeta mo lisin long wanwan long olgeta.

- Taem yumi save olsem wanem God i lukluk mo lavem ol pikinini blong Hem, ?olsem wanem nao hemia i helpem yumi long laef blong yumi?
- Taem yu save se yu wan pikinini blong God, ?olsem wanem nao hemia i helpem yu blong gat saksen long skul?





# 4

## Mekem Ol Gol blong Helpem Ol Pikinini blong Yu blong Gat Sakses

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?From wanem nao hem i impoten blong gat ol gol?
3. ?Yu filim olsem wanem taem yu komplitim wan gol we yu bin mekem?



## Lanem Samting

Sapos yu wantem stretem wan problem o mekem wan samting, yu nid blong disaed long olsem wanem bae yu mekem. Hemia nao oli singaotem blong mekem wan gol. Blong stap helpem ol pikinini blong yu blong lanem blong mekem ol gol, bambae i helpem olgeta blong kasem saksas.

Yu wetem ol pikinini blong yu, i save mekem wan gol long fofala isi step ia:

1. Faenemaot
2. Mekem Plan
3. Tekem Aksan
4. Tingtingbak

Lukluk eksampol daon ia blong luk olsem wanem ol step ia i save helpem yu wetem ol pikinini blong yu blong mekem ol gol.

### 1. Faenemaot:

*?Wanem nao yu nid blong kam antap long hem o blong jenisim?*

Gel blong mi i stap fesem hadtaem long matematik. Hem i bin askem help long mi, be mi mi nogud long matematik.

### 2. Mekem Plan:

*?Wanem nao ol step we yu nid blong tekem?*

Bae mi toktok long tija blong hem wetem ol nara papa mo mama abaot ol wei blong helpem gel blong mi wetem matematik.

### 3. Tekem Aksan:

*?Yu nidim moa help?*

Mi bin prea from help. Mi filim se mi sapos blong toktok wetem wan memba long wod blong mi we i wan tija. Hem i talem se bambae hem i tijim gel blong mi. Mifala i putum wan taem blong tufala i mit evri wik.

### 4. Tingtingbak:

*?Wanem nao yu bin lanem? ?Yu nidim blong mekem wan niu gol o gohed long gol ia?*

Mi nid blong jek evri dei wetem gel blong mi blong luk olsem wanem nao hem i stap progres long matematik asaenmen blong hem mo luklukbak long ol not blong hem.

## Tingting mo Prea

Tingting long wanem yu bin lanem. Raetemdaon eni tingting we yu gat o ol aedia we oli kam long Tabu Spirit. ?Wanem nao yu ting se Lod i wantem yu blong mekem? ?Olsem wanem nao yu save soem eksampol long ol pikinini blong yu blong taem yu stap mekem mo komplitim ol gol?

---



---



---

# 4

## Mekem Ol Gol blong Helpem Ol Pikinini blong Yu blong Gat Sakses

### Aktiviti

Tingbaot wan samting we yu wantem mekem blong kam antap moa long hem, o blong jenisim. Yusum tufala fasfala step ia blong mekem wan gol.

Afta we yu mekem plan blong yu, kambak long aktiviti ia mo komplitim tufala nekis step ia:

#### 1. Faenemaot:

*?Wanem nao yu nidim blong kam antap moa long hem o blong jenisim?*

#### 2. Mekem Plan:

*?Olsem wanem nao bae yu save kam antap moa o mekem jenis ia? ?Wanem ol step we yu nid blong tekem?*

#### 3. Tekem Aksen:

*?Olsem wanem nao fet long jisas Kraes i helpem yu blong kasem gol blong yu? ?Yu nidim moa help?*

#### 4. Tingtingbak:

*?Wanem nao yu bin lanem? ?Yu ting se yu nid blong mekem wan niu gol o gohed long gol ia?*

**Toktok wetem Famli Blong Yu**

Toktok wetem famli blong yu abaot wanem yu bin lanem. Askem ol memba blong famli blong yu blong serem ol tingting blong olgeta mo lisin long wanwan long olgeta.

- Helpem ol pikinini blong yu blong mekem ol gol. Prea tugeta blong save wanem oli sapos blong mekem.
  - Raetem gol blong wanwan pikinini daon ia. Tokbaot olsem wanem bae yu helpem wanwan pikinini blong kasem gol blong hem.
- 
- 
- 



# 5

## Lanem Samting Tugeta long Hom

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem nao ol pikinini oli lan taem oli wok mo pleiplei tugeta?
3. ?Wanem nao yu mekem wetem ol pikinini blong yu antap long skul, we i helpem olgeta blong lan?



### Lanem Samting

Ol famli oli save mekem ol hom oli kam ol ples we Tabu Spirit i save helpem olgeta blong lanem samting. Oli save tokbaot Jisas Kraes mo traem blong kam moa olsem Hem. Yu save mekem fulap samting blong invaetem Tabu Spirit insaed long hom blong yu mo kipim famli blong yu i strong. Yu save prea mo ridim olgeta skripja olsem wan famli evri dei, laef folem gospel, mo givim seves long ol narawan.

Taem we Tabu Spirit i stap long hom blong yu, bae famli blong yu i tritim wanwan insaed long hom wetem kaen fasin mo lav. Taem ol pikinini blong yu oli filim se oli lavem olgeta, oli filim sapot we oli nidim blong save gat saksas.

Ol samting ia, bae oli help blong hom blong yu i wan ples blong lav mo lanem samting:

- Gat fasin blong save wet longtaem.
- Traem blong no kros.
- Spendem taem tugeta.
- Gat gudfala taem.
- Lisin gud.
- Presem ol pikinini blong yu taem oli stap traem blong lanem samting.
- Yusum ol toktok we oli kaen.



### Tingting mo Prea

Tingting long wanem yu bin lanem. Raetemdaon eni tingting we yu gat, o, ol aedia we oli kam long Tabu Spirit. ?Wanem nao yu ting se Lod i wantem yu blong mekem? ?Wanem ol samting we yu save mekem blong gat, o soem moa lav insaed long hom blong yu?

---



---






---

**Aktiviti**

Tingbaot ol samting we bae i save helpem hom blong yu blong i fulap wetem lav.

Raetemdaon tu o tri aedia blong ol samting we yumi save luk, harem, mo filim sapos hom blong yumi i fulap wetem lav.

 <b>?Wanem nao yu luk taem yu lukluk raon long hom blong yu?</b>	 <b>?Wanem nao yu harem ol famli memba blong yu oli stap talem long wanwan long olgeta?</b>	 <b>?Wanem nao ol memba blong famli oli filim taem oli stap long hom?</b>
<ul style="list-style-type: none"> <li>▪ Eksampol: Pipol oli helpem wanwan long olgeta.</li> </ul>	<ul style="list-style-type: none"> <li>▪ Eksampol: Ol kaen toktok.</li> </ul>	<ul style="list-style-type: none"> <li>▪ Eksampol: Oli filim se oli lavem olgeta.</li> </ul>

Helpem ol pikinini blong yu taem ol samting i kam had long olgeta. Hemia i wan eksampol long olsem wanem yu save soem lav blong yu long gel blong yu we i stap gat wan hadtaem:

Gel blong yu i mekem wan bigfala eksam blong hem. Hem i wok had tumas. Be hem i gat wan mak we i nogud mo hem i harem nogud. Naoia hem i mas tekem eksam ia bakegen long nekis sikis manis. Bae yu mas pem eksam fi ia bakegen.

Hemia i wan had samting. Yu mo gel blong yu, yutufala tugeta i harem nogud. Hemia sam samting we yu save talem long hem blong soem lav blong yu long hem:

- Mi lavem yu. Mi save se yu wok had tumas from. Mi stap ia oltaem blong yu.
- Mi harem nogud se yu no karem wan gudfala mak long eksam blong yu. Mi save se yu harem nogud tu. ?Wanem nao mi save mekem blong helpem yu?

**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin andanit ia. Askem ol memba blong famli blong oli serem ol tingting blong olgeta mo lisin long wanwan long olgeta.

- ?Wanem nao yumi save mekem olsem wan famli blong gat Tabu Spirit i stap moa long hom?
- ?Olsem wanem nao yumi save soem moa lav mo respek long wanwan long yumi?
- ?Olsem wanem nao lav insaed long hom blong yumi i helpem yumi evriwan blong lan?





# 6

## Yusum Taem Wetem Waes

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Wanem ol samting long laef blong yu we oli impoten moa?
3. ?Olsem wanem nao yu save yusum moa taem blong mekem ol samting we oli moa impoten, long yu mo famli blong yu?



**Lanem Samting**

Taem i wan presen we i kam long Papa long Heven. Yumi mas tingting gud abaot olsem wanem yumi stap yusum taem blong yumi. I gat plante wei blong yusum taem evri dei. Yumi wok, pleiplei, mekem kaekae, prea, mekem ol wok blong haos, stadi, mo mekem plante nara samting. Yumi mas jusum ol bes wei blong yusum taem blong yumi.

Mekem wan plan blong helpem yu blong yusum gud taem blong yu. Tingting abaot wanem yu gat blong mekem long wan dei. ?Wanem ol samting we oli moa impoten? ?Wanem ol samting we oli no impoten tumas? Plan blong mekem ol samting we oli moa impoten faswan. Yusum smol taem nomo, long ol samting we oli no impoten, mo oli no helpem yu mo famli blong yu blong kasem ol gol blong yufala.

Yu mo famli blong yu i save toktok tugeta oltaem abaot wanem i impoten. Yu save mekem wan plan blong helpem wanwan long yufala blong yusum taem blong yufala wetem waes.

**Tingting mo Prea**

Tingting long wanem yu bin lanem. Raetemdaon eni tingting we yu gat, o, ol aedia we oli kam long Tabu Spirit. ?Wanem nao i moa impoten long laef blong yu? ?Wanem wan wei we yu save yusum moa taem blong mekem ol samting we oli moa impoten long laef blong yu?

---

---

---



# 6

## Yusum Taem Wetem Waes

---

### Aktiviti

I gat plante wei we yumi save yusum taem blong yumi. Hemia sam samting we yu save mekem long wan dei:

---

Ridim ol skripja	Stap long fon blong yu	Mekem kaekae
Wajem TV	Klinim haos	Wok
Go long maket	Plei	Stadi
Mekem koling blong yu long Jos Prea	Helpem ol pikinini blong lanem samting	

---

Yu save mekem tu ol narafala samting evri dei. Tingbaot evri samting we yu stap mekem.

---

?Wanem ol tu o trifala samting we yu wantem blong yusum **moa taem** long hem?

---

?Wanem ol tu o trifala samting we yu wantem blong no yusum **tumas taem** long hem?

---

**Toktok wetem Famli blong Yu**

Toktok wetem famli blong yu abaot wanem we yu lanem. Toktok raon long ol kwestin andanit ia. Askem ol memba blong famli blong yu, blong oli serem ol tingting blong olgeta mo lisin long wanwan long olgeta.

- ?Wanem ol samting we oli moa impoten long famli blong yumi?
- ?Wanem nao yumi save mekem olsem wan famli, blong yusum gud taem blong yumi blong mekem ol samting we oli impoten long yumi?
- ?Olsem wanem nao yumi save helpem wanwan long yumi blong yusum gud taem blong yumi?



# 7

## Helpem Ol Pikinini blong Praktis blong Rid, Raet, mo Mekem Matematik

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem nao yu ting se ol pikinini oli filim blong stap lanem samting?
3. ?Olsem wanem nao yu helpem ol pikinini blong yu blong lan evri dei?



### Lanem Samting

Ol pikinini oli lanem plante samting long skul. Oli save praktis long hom blong helpem olgeta blong tingabaot wanem oli bin lanem. Hemia sam wei blong helpem ol pikinini blong yu blong praktis blong stap rid, stap raet, mo mekem matematik evri dei:

#### Stap rid

Blong stap rid hem i wan impoten wei blong ol pikinini oli lanem samting. Ol papa mo mama oli save helpem ol pikinini blong olgeta blong andastanem olsem wanem nao fasin blong stap rid bae i helpem olgeta long skul mo long laef blong olgeta. Ol pikinini oli save lan blong rid moa gud taem oli stap rid long olgetawan o rid laod long ol nara man evri dei. Yu save askem long ol pikinini blong yu blong rid long yu taem yu stap mekem kaekae o wok long hom blong yu. Yu save askem tu blong oli ridim ol toktok o ol ves long ol skripja. Ol bigbigfala pikinini oli save rid long ol smolsmol brata mo sista blong olgeta.



#### Stap Raet

Blong stap raet i save helpem ol pikinini blong tingting mo lan. Taem oli raet, ol pikinini oli save serem ol tingting blong olgeta mo yusum ol niu toktok. Yu save askem ol pikinini blong yu blong raet smolsmol evri dei. Sam pikinini oli laekem blong raetem ol stori. Ol narawan oli laekem blong stap raet abaot ol samting we i hapen long olgeta. Askem ol pikinini blong yu blong ridim wanem oli raetem long yu.



#### Matematik

Blong stap lanem ol skil blong matematik hem i impoten tumas. Ol skil ia oli yusum long ol bilding, blong stap kuk, mo ol nara pat blong laef evri dei. Plante pikinini oli ting se matematik hem i had. Be i no sapos blong i olsem. Yu save helpem ol pikinini blong yu blong lanem matematik evri dei. Askem olgeta blong kaontem mane o pem ol samting long maket. Askem olgeta blong kaontem ol samting long hom o taem yu kukum kaekae. Hemia bae i helpem olgeta blong tingabaot ol namba, mo olsem wanem oli yusum matematik evri dei.





**Tingting mo Prea.**

Tingting long wanem yu bin lanem. Raetemdaon eni tingting we yu gat o ol aedia we oli kam long Tabu Spirit. ?Olsem wanem yu stap helpem ol pikinini blong yu blong praktis blong stap rid, stap raet, mo mekem matematik evri dei?

**Aktiviti**

Lukluk long ol lis ia andanit. Droem wan tik (✓) long bokis narasaed long ol samting we yu wantem mekem wetem ol pikinini blong yu.

 <b>Stap Rid long Hom</b> Wetem ol pikinini blong yu:	 <b>Stap Raet long Hom</b> Askem ol pikinini blong yu blong:	 <b>Matematik long Hom</b> Wetem ol pikinini blong yu:
<ul style="list-style-type: none"> <li><input type="checkbox"/> Ridim wan buk laod.</li> <li><input type="checkbox"/> Ridim ol raeting we oli stap long ol samting.</li> <li><input type="checkbox"/> Tekem taem blong stap ridim ol skripja.</li> <li><input type="checkbox"/> Ridim ol saen long rod.</li> <li><input type="checkbox"/> Talem ol nem blong ol leta we oli luk.</li> </ul>	<ul style="list-style-type: none"> <li><input type="checkbox"/> Dro ol pikja mo tokabaot ol pikja ia long yu.</li> <li><input type="checkbox"/> Raetem ol leta.</li> <li><input type="checkbox"/> Raetem ol stori.</li> <li><input type="checkbox"/> Raetem ol nem blong ol famli memba.</li> <li><input type="checkbox"/> Raet long wan jenol.</li> </ul>	<ul style="list-style-type: none"> <li><input type="checkbox"/> Kaontem ol samting long maket.</li> <li><input type="checkbox"/> Skelem ol kaekae blong kuk taem oli stap kuk.</li> <li><input type="checkbox"/> Ademap mo karemaot ol namba.</li> <li><input type="checkbox"/> Praktisim wan problem blong matematik tugeta.</li> <li><input type="checkbox"/> Ridim taem long wan klok.</li> </ul>

**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin andanit ia. Askem ol memba blong famli blong yu, blong oli serem ol aedia blong olgeta mo lisiin long wanwan long olgeta.

- ?Wanem ol samting yu bin lanem long skul?
- ?Olsem wanem nao yumi save help wanwan long yumi blong rid mo raet evri dei?
- ?Olsem wanem yumi save helpem wanwan long yumi blong mekem matematik evri dei?





# 8

## Helpem Ol Pikinini Wetem Skulwok long Hom

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem nao yu stap helpem ol pikinini blong yu wetem ol skulwok blong olgeta long hom?
3. ?Huia bae i help sapos skulwok blong ol pikinini blong yu, oli had tumas long yu blong yu helpem olgeta long hem?



### Lanem Samting

Samtaem wanem we ol pikinini blong yu oli lanem long skul i had tumas long yu blong yu andastanem mo helpem olgeta wetem. Hem i oraet sapos yu no save evri samting. I gat plante samting yet we yu save mekem blong helpem ol pikinini blong yu long skul.

#### Skulwok

Tijim ol pikinini blong yu blong wok long skulwok blong olgeta evri dei. Sapos ol pikinini blong yu oli gat skulwok we oli nid blong finisim long hom, helpem olgeta blong wok long hem. Yu save helpem ol pikinini blong yu blong mekem wan plan blong finisim skulwok blong olgeta long taem. I save help bigwan, sapos ol pikinini oli gat wan kwaet taem mo ples blong stadi long hom. Yu save helpem ol pikinini blong yu blong oli askem wan tija, fren, o wan nara adalt blong help sapos skulwok blong olgeta i had tumas.



#### Ol Eksam

Askem ol pikinini blong yu sapos oli andastanem wanem oli stap lanem. Askem olgeta wanem oli nidim blong save blong ol eksam. Sapos oli nidim help, yu save toktok long ol tija blong olgeta o letem olgeta i askem ol tija blong olgeta blong help.

Yu save helpem ol pikinini blong yu blong stadi from ol eksam, taem yu mekem olgeta i ansarem ol kwestin blong ol eksam blong bifo. Yu save prea tugeta tu from help. Traem blong givim kaekae mo wota long ol pikinini blong yu bifo oli tekem eksam blong mekem

se oli save tingting gud mo no stap hanggri. Talem long ol pikinini blong yu se yu biliv long olgeta mo we yu lavem olgeta nomata sapos oli no mekem gud long eksam blong olgeta.



### Tingting mo Prea

Tingting long wanem yu bin lanem. Raetemdaon eni tingting yu gat o ol aedia we i kam tru long Tabu Spirit. ?Olsem wanem nao yu save helpem ol pikinini blong yu blong oli mekem skulwok blong olgeta mo stadi from ol eksam?

---





---



---

### Aktiviti

Lukluk long lis ia andanit. Droem wan tik (✓) long bokis narasaed long ol samtng we yu wantem blong mekem wetem ol pikinini blong yu.

 <b>Skulwok long Hom</b>	 <b>Rere long Eksam</b>
<ul style="list-style-type: none"> <li><input type="checkbox"/> Askem ol pikinini blong yu wanem oli stap lanem.</li> <li><input type="checkbox"/> Helpem ol pikinini blong yu wetem skulwok.</li> <li><input type="checkbox"/> Traem blong faenem wan taem mo wan ples blong ol pikinini blong stadi.</li> <li><input type="checkbox"/> Askem ol pikinini blong yu wetaem oli mas givim skulwok blong olgeta long tija blong olgeta.</li> <li><input type="checkbox"/> Sapos oli nidim help, letem ol pikinini blong oli askem wan fren o wan tija blong i help.</li> <li><input type="checkbox"/> Prea blong save olsem wanem blong helpem ol pikinini blong yu.</li> </ul>	<ul style="list-style-type: none"> <li><input type="checkbox"/> Askem ol pikinini blong yu sapos oli andastanem wanem oli stap lanem.</li> <li><input type="checkbox"/> Askem ol pikinini blong yu wanem oli nid blong save blong eksam blong olgeta.</li> <li><input type="checkbox"/> Mekem ol pikinini blong yu blong oli stadi long ol kwestin blong eksam we i pas finis.</li> <li><input type="checkbox"/> Givim kaekae mo wota long ol pikinini blong yu bifo oli mekem wan eksam.</li> <li><input type="checkbox"/> Talem long ol pikinini blong yu se yu lavem olgeta nomata sapos oli no mekem gud long ol eksam blong olgeta.</li> </ul>

**Toktok wetem Famli blong Yu**

Toktok wetem famli blong yu abaot wanem yu bin lanem. Toktok raon long ol kwestin we oli stap andanit ia. Askem ol memba blong famli blong yu, blong oli serem ol tingting blong olgeta mo lisiin long wanwan long olgeta.

- ?Olsem wanem yumi save helpem ol memba blong famli wetem skulwok blong olgeta?
- ?Wanem yumi save mekem blong helpem ol memba blong famli blong oli stadi from ol eksam blong olgeta?
- ?Weaples nao ol famli memba oli save stadi long hom?



# 9

## Kam Pat long Edukesen blong Ol Pikinini blong Yu

### Ol Kwestin blong Tokbaot

1. Lukluk ol pikja ia. ?Wanem nao yu luk?
2. ?Olsem wanem yu save kam pat blong edukesen blong pikinini blong yu?
3. ?Olsem wanem ol pikinini blong yu oli save askem help long ol tija sapos oli no andastanem samting?



### Lanem Samting

Yu save toktok wetem ol pikinini blong yu, wok wetem olgeta, pleiplei wetem olgeta, rid wetem olgeta, mo lisin long olgeta. Hemia bae helpem ol pikinini blong yu blong filim lav blong yu. Mo yu save askem abaot wanem oli stap lanem long skul. Askem olgeta abaot wanem samting we isi long olgeta. Askem olgeta abaot wanem samting we i no isi long olgeta. Askem olgeta, olsem wanem oli filim abaot tija blong olgeta. Sapos yu ting se bae yu save helpem ol pikinini blong yu, yu save askem ol tija blong olgeta blong save gat wan janis blong toktok wetem olgeta.

Plante taem ol tija oli laekem taem ol papa mo mama oli toktok wetem olgeta, mo askem olgeta olsem wanem oli save helpem ol pikinini blong olgeta blong oli wok gud long skul.

Bifo yu mit wetem ol tija blong ol pikinini blong yu, raetemdaon ol kwestin we yu wantem askem. Hemia sam samting we yu save mekem:

1. Talem tangkyu long tija blong tijim pikinini blong yu.
2. Askem ol tija olsem wanem ol pikinini blong yu oli stap wok long klas blong olgeta.
3. Askem ol tija olsem wanem yu save helpem ol pikinini blong yu blong wok gud long skul.
4. Askem ol tija sapos i gad sam impoten deit we yu mas save.

Sapos yu no save mit wetem ol tija ia, bae yu save gat janis blong kasem olgeta long ol wei ia.

- Sendem wan teks mesej.
- Sendem wan imel.
- Toktok long mobael fon.
- Raetem leta

I gat plante man mo woman oli stap helpem ol pikinini blong yu blong lanem samting evri dei. Tingbaot ol nara man mo woman we yu save toktok long olgeta abaot fasin blong lanem samting blong ol pikinini blong yu.



**Tingting mo Prea.**

Tingtingbak long wanem yu bin lanem. Raetemdaon eni tingting we yu gat, o, ol aedia we oli kam long Tabu Spirit. Olsem wanem taem yu toktok wetem ol nara man mo woman abaot fasin blong lanem samting blong ol pikinini blong yu i save helpem ol pikinini blong yu long kul?

---

---

---

**Aktiviti**

Raetemdaon tri samting we yu wantem blong askem o tokbaot wetem ol tija blong ol pikinini blong yu o ol nara man mo woman we oli stap helpem ol olgeta blong lanem samting.

---

---

---

**Toktok wetem Famli Blong Yu**

Toktok wetem famli blong yu abaot wanem yu bin lanem. Toktok raon long ol kwestin we oli stap andanit ia. Askem ol memba blong famli blong serem ol tingting blong olgeta mo lisin long ol narawan.

- ?Huia olgeta pipol, insaed long laef blong yumi, we oli stap helpem yumi blong lanem samting?
- ?Olsem wanem nao ol narawan oli stap helpem wanwan memba blong famli long skul?





# Ol Wei blong Helpem Ol Pikinini blong Yu blong Gat Saksess long Skul mo Filim se Oli Lavem Olgeta

- Tijim mo soem long ol pikinini blong yu se, blong stap lanem samting, i save helpem olgeta blong oli kam moa olsem Jisas Kraes.
- Helpem ol pikinini blong yu blong oli save se oli ol pikinini blong God we oli save lanem samting mo groap.



- Toktok long ol pikinini blong yu wetem lav mo kaen fasin, mo helpem olgeta blong oli gohed blong traem.
- Talem long ol pikinini blong yu se yu biliv long olgeta mo oltaem lavem olgeta.

- Putum ol gol wetem ol pikinini blong yu blong save helpem olgeta blong yusum taem blong olgeta wetem waes.
- Helpem ol pikinini blong yu blong stap praktis blong rid, raet, mo mekem matematik evri dei.



- Helpem ol pikinini blong yu blong stadi from skul mo ol eksam.
- Toktok wetem ol tija blong ol pikinini blong yu mo ol narawan we oli stap helpem olgeta blong lanem samting.

# 9

## Kam Pat long Edukesen blong Ol Pikinini blong Yu

Raetem sam long ol samting we oli moa impoten, we yu bin lanem long gaedbuk ia.

---

---

---

---

---

---

---

---



---

“Koling ia blong stap wan papa mo mama, i tekem presen ia, blong tij long ol wei we oli stret blong yu mo blong ol pikinini blong yu” (Robert D. Hales, “‘Come, Follow Me’ by Practicing Christian Love and Service,” *Liahona*, Nov. 2016. 23).

